

# Women's Club of Aruba a tuma despedida di life member Paula Ecury



ORANJESTAD (AAN)- Recientemente directiva y miembrecia di Women's Club of Aruba (WCA) a tuma despedida di Paula Ecury-Spreuwenberg, miho conoci como Paula, un Life member hopi aprecia, kende a fayece dia 10 di juni ultimo na e bunita edad di 93 aña.

Pa honra su memoria, nos ta bay bek den historia y comparti su añanan como miembro activo di WCA. Durante e añanan cu el a traha como boluntario, Paula tabata un miembro hopi valioso, no solamente pa nos organisacion, pero tambe pa otronan. El a traha como maestra na FAVI pa mas di 12 aña y como un boluntario den directiva di Koningin Wilhelmina Kanker Fonds.

Paula a join Women's Club of Aruba na aña 1973 y semper e tabata participa na e reunionnan general di miembresia y den e diferente comitenan. E tabata specialmente interesa den e "LIMPI Committee", un comite cu ta traha riba

proyectonan pa concientisa comunidad di e importancia pa tene Aruba Limpi y cuida nos naturalesa.

E comite tabata organisa competencia entre e scolnan basico di Aruba, dunando varios premio pa e scolnan cu e cura mas limpi y liber di sushi.

Pasando den e fotonan di antes, nos ta wak e riba un foto di aña 1997, rondona pa barinan di sushi cu tabata cla pa bay e scolnan, pa siña nos muchanan tocante reciclahe y separacion di sushi na scol.

Durante aña 1987-1988, Paula tabata forma parti di e directiva di WCA, bou di presidencia di Sra. Enid Croes-Marugg.

Na aña 2009, Paula a ser honra como Life member, un reconocimiento pa su 40 añanan di servicio na nos comunidad y Club.

Te hasta un par di aña atras, Paula tabata atende nos reunionnan mensual di miembresia y el a hasta participa na actividadnan di e comision di Study Group pa hunga canasta.



Nos tin cu remarca cu e tabata un tremendo hungado di canasta!

Como persona, Paula tabata hopi "to the point", expresando su opinion y semper hopi "down to earth". Semper e tabata tin un smile riba su cara y tabata tin bon sentido di humor.

Aunke e ultimo añanan su salud a cuminsa bay atras, e tabata semper contento ora nos tabata bishite.

E tabata hopi conciente cu su salud no tabata mehora y cu su ora di bay tabata yegando.

Paula a biba su bida cu proposito, lagando atras un legado di amor, dedicacion y lealtad pa cu su famia, amigonan y colega miembronan di WCA.

E aña aki tabata un aña dificil pa su famia, prome cu e fayecimento di su nura Jeanne, tambe un miembro activo di e Club, y awo e mes. E ta un gran perdida pa e Club, cu a perde dos miembro hopi aprecia. Pero semper lo recorda e momentonan cu nan a comparti cu nan y e proyectonan pa comunidad di Aruba cu nan a yuda realisa. Di parti di WCA, nan ta expresa un biaha mas nan mas sincero condolencia na su yiunan, nietonan y demas famia. Cu tante Paula sosega na paz: "Rust zacht, lieve Paula".

